

欽定剿平粵匪方略

欽定勦平粵匪方略卷三百九十九 甲子年

十二月初一日 戊辰 左宗棠奏言 臣督師入閩行

抵浦城疊據稟報漳州龍巖南靖永定平和雲
霄各城賊尙屯踞如故署陸路提督林文察十
月十二日進勦漳郡踞逆副將惠壽營盤先陷
林文察退紮玉洲十一月初三日漳郡踞逆出
犯萬松關瑞香亭陸路各營又分股直撲水營

林文察督軍接仗因後路被賊抄襲兵勇敗潰
林文察中槍陣亡其瑞香亭萬松關陸營同時
失陷幸高連陞一軍初七日已抵泉州據函稱
逆賊勢甚熾張土匪從亂如歸泉廈岌岌高連
陞率所部急趨同安以保泉廈尙未知能否到
在賊前其黃少春劉明珍所部臣本飭其暫駐
延平聽候調遣旋准撫臣來咨已經調赴省並

調赴長泰據黃少春稟擬初八日前進此東路
進兵之情形也其龍巖州踞逆散布長汀連城
甯洋各界時出窺伺臣咨劉典先將汀州連城
甯洋一帶踞匪肅清以攻龍巖之北復調新署
福建臬司王德榜由瑞金馳赴汀州擬俟其到
後出汀州南趨上杭以攻龍巖之西須驅逆賊
歸併一處嚴遏北竄彼此聯絡而後兵力乃敷

分佈現據劉典函報其前隊已抵甯化王德榜
一軍由江西取道入閩計此時亦可馳抵汀界
此西路進兵情形也其中路以延平爲最要蓋
延平距省會四百里一水可通既可據上游以
杜窺伺之萌復可策應龍漳諸軍爲犄角之計
臣因中路空虛已飭隨行四營馳赴延平臣隨
卽督率親兵續進俟抵延平後察看情形續報

至前奉

諭旨鮑超所部婁雲慶等由臣調遣此時尙無入閩
消息林文察失利陣亡所部各營死傷潰逃情
形容會同撫臣徐宗幹查明後分別辦理奏入

上命議政王軍機大臣傳諭左宗棠毛鴻賓沈葆楨
徐宗幹郭嵩燾曰閩省漳州各城均爲賊踞署提
督林文察中槍陣亡賊勢狻猖泉廈危急高連陞

一軍已抵泉州著左宗棠徐宗幹飛檄該署提督
迅率所部急趨同安務期到在賊前扼要防剿以
保泉廈門戶並飭調赴長泰之黃少春等軍合力
兜剿穩慎進取毋令賊蹤再行滋蔓劉典前隊已
抵甯化王德榜一軍由江西取道入閩計已馳抵
汀界著卽照左宗棠所籌飛飭劉典所部先將汀
州連城甯洋一帶踞匪肅清進取龍巖之北王德

榜所部由汀州南趨上杭進攻龍巖之西總期聯絡遏截妥籌分布將龍巖踞逆悉數聚殲以免復行旁竄左宗棠因中路空虛先撥隨行四營馳赴延平卽率親兵續進著俟抵延平後居中策應分籌遏勦卽將辦理情形迅速奏聞漳龍一帶賊勢鴟張各軍分路環攻能將該踞逆在閩境就地聚殲自屬上策恐該匪被勦窮蹙銜而走險則回竄

江西旁窺粵境或潛蹤入海均在意中毛鴻賓郭嵩燾所派粵軍前已越境收復武平等城著仍遵前旨迅飭方耀等軍跟蹤追剿會合江西閩浙之軍進規漳郡殄除竄匪其閩粵濱海地方並著左宗棠徐宗幹毛鴻賓郭嵩燾撥兵嚴防儻任令匪蹤入海剽掠必惟該督等是問江西援閩之婁雲慶等軍現在行抵何處著沈葆楨迅催前進並由

左宗棠徐宗幹探明催提以厚兵力沈葆楨務當
嚴飭江防諸軍力扼要隘以杜匪蹤回竄林文察
陣亡詳細情形並著左宗棠等查明具奏再降諭
旨

左宗棠又奏言查布政使銜浙江按察使劉典
自上年聞訃丁憂回籍卽請開缺終制嗣以逆
賊竄入江境臣檄其由湘募勇赴江援剿旋奉

旨幫辦江皖軍務現在江境肅清閩省被賊竄擾臣
檄其由建昌取道汀連相機進剿該臬司以墨
經從戎雖義無可諉而服官從政終覺心有未
安再四呈請開缺俟閩省軍務完竣回籍終制
臣察其情詞極爲懇切合無仰懇

天恩俯准開劉典署浙江按察使缺仍以二品頂戴
幫辦福建軍務俾臣得收指臂之助奏入

上諭內閣曰浙江按察使劉典自上年丁憂後曾經
降旨改爲署任並令幫辦江皖軍務現在江境肅
清經左宗棠檄令進剿福建賊匪該署臬司自以
丁憂人員服官從政於心未安呈請開缺情詞至
爲誠懇署浙江按察使劉典著准其開缺仍以二
品頂戴幫辦左宗棠軍務

初五日
壬申張之萬奏冒據報髮捻各匪因官兵

失利勢又猖獗十月十五六等日疊撲鄧州城垣經馬步各軍擊退悉竄鎮平之黑龍集侯集等處刻下鎮平西南北三面均有寇蹤西北爲馬山口入山之路西南則由內鄉趨淅川頭頭是道實屬防不勝防臣於二十六日行抵舞陽催令王文行勇隊前進復接僧格林沁函會知已移紮南陽整頓隊伍臣一面飛飭湯聘珍等

各營星夜繞由南召魯山出賊之前扼賊北竄
河汝之路一面飛飭河陝汝地方文武號召民
團堅壁清野力保完區俟僧格林沁振軍復進
然後合力痛勦惟僧格林沁之軍新挫需兵殊
急其所調皖軍英翰蔣凝學之隊又祇令進駐
商城遇有綏急深恐鞭長莫及臣已知會喬松
年催令皖軍由信陽入境迅赴宛南以厚兵力

至鄧州各營軍裝器械大半損失急須添補侍郎毛昺熙暫留汝郡督率糧臺委員簡練軍實陸續運赴前敵以資整頓仍將汝南善後各事宜認真布置料理就緒卽星馳赴宛與臣會籌

一切

張之萬又奏言逆衆志在入山南召內鄉之間鳥道羊腸斷非用騎之地步隊甫經挫衄猝難

整頓若召募新軍旣恐緩不濟急且將領難得
其人查總兵陳國瑞驍勇過人聲威素著自隨
僧格林沁勦辦楚豫竄匪以來每戰必捷所部
不過三千餘人而數萬賊衆當之輒北前因病
請假在光州就醫聞已痊愈合無仰懇

天恩飭令陳國瑞速赴僧格林沁軍營帶兵勦賊以
期迅殄妖氛奏入

上命議政王軍機大臣傳諭僧格林沁官文張之萬
沈桂芬劉蓉曰張之萬奏逆賊勢又猖獗疊撲鄧
州城垣經馬步各軍擊退復向鎮平一帶竄擾張
之萬已行抵舞陽僧格林沁現在移紮南陽著卽
整頓各軍會合痛剿務須就地殄除毋任再行四
竄英翰及蔣凝學二軍能否酌調赴營著該親王
察度辦理陳國瑞打仗向稱勇往據張之萬奏該

總兵因病請假在光州調理諒已就痊著僧格林沁飛調該總兵迅赴前敵以資得力張之萬務當嚴飭湯聘珍等營繞由南召出賊之前扼賊北竄河陝之路並飛檄河陝汝地方整飭民團共資保衛王文行勇隊催令卽日前進會合僧格林沁所派之軍合力痛擊無任觀望賊勢驟駭西趨若一入山險又成不了之局劉蓉責任封圻自當設法

籌備方爲不負委任著卽嚴飭地方官實力辦理
團練以補官軍之不足仍於附近營汛抽調兵勇
擇要設防儘任令匪蹤闖入定惟該撫是問均光
鄖陽與鄖州鎮平接壤偏近賊氛著官文嚴飭鄖
西一帶防兵認真截剿毋得縱令西竄致滋蔓延
現在河冰凍結之時賊蹤若至陝汝卽易履冰過
河沈桂芬務須嚴飭地方文武各員實力巡防備

豫不虞不得以寇氛尙遠稍涉大意

同日徐宗幹奏冒署陸路提督林文察進攻漳州踞逆移營至近城之萬松關瑞香亭等處署水師提督曾玉明所部駐泊三汊河一帶互相策應十一月初三日該逆由東門先出數千人前來撲營當被我軍擊退另有大股約數萬人由好景山等處四路包抄將萬松關瑞香亭營

盤全行圍裏林文察親督兵勇奮擊相持五時
之久賊來愈多我軍寡不敵衆疊有傷亡林文
察手刃數賊未能突出重圍中槍殞命曾玉明
當飭林文察所部遊擊許忠標等管帶兵勇一
千三百餘名嚴扼江東橋要隘該營仍泊三汊
河駐守幸浙省援師高連陞一軍先已由省起
程計期已過泉州黃少春等軍亦陸續由泉州

進發有此勁旅接應人心賴以鎮定現飭護漳
州鎮郭什春馳赴江東橋會同曾玉明收集各
軍鼓勵團練合力堵禦其陸路提督一缺咨商
督臣批飭黃少春暫行署理以資統率查林文
察在浙閩帶兵勦匪身先士卒所向有功今以
衆寡不敵血戰捐軀實深憫惜應請

飭部將署福建陸路提督福甯鎮總兵林文察照提

督例從優議卹以慰忠魂同時陣亡之遊擊李世進都司謝朝典守備關文忠同知平懋儒同知銜知縣謝穎蘇並請一併議卹至汀龍各路康國器一軍駐紮離龍巖州城四十里之雁石地方汀屬餘匪分竄長汀上杭連城等處張恆祥統帶湘勇移紮長汀河田地方關鎮國所部扼守上杭連城一帶劉典前隊已入汀境俟全

軍到齊卽行分路攻勦

徐宗幹又奏冒正緒摺開據報高連陞一軍於十一月十三日由泉屬向安前赴漳境江東橋距府城三十餘里黃少春全隊於十五日亦由泉州進紮漳城外之萬松關瑞香亭等處該逆新築賊壘被官軍同義民攻毀踞匪復退入城等語近聞逆黨各懷猜忌城內連日互鬪自相

殘殺多人該逃分股出屯城外西路一帶各鄉
見大兵雲集亦齊舉義旗合力防剿奏入

上命議政王軍機大臣傳諭左宗棠徐宗幹曰高連
陞等軍陸續前進著左宗棠徐宗幹嚴檄派出各
軍協力掃蕩迅殄逆氛福建陸路提督卽著黃少
春暫行署理以資統率賊黨各懷猜忌城內連日
互鬪自相殘殺當此機有可乘如能迅速進兵尤

爲事半功倍卽著該督撫相機辦理汀州龍巖各路康國器一軍駐紮雁石張恆祥移紮長汀河田關鎮國扼守上杭連城劉典前隊已入汀境昨據左宗棠奏擬令劉典攻龍巖之北王德榜攻龍巖之西並以中路空虛先撥隨行四營馳赴延平此時劉典等計皆次第到防著左宗棠徐宗幹督飭閩浙官軍妥籌勦辦將失陷各城力圖規復務將

此股逆匪就地殄除毋令再行回竄江西廣東或潛蹤入海復肆蔓延又成不了之局

上諭內閣曰署福建陸路提督林文察前在浙江福建等處帶兵勦匪所向有功此次進攻漳州踞匪該逆率衆來撲官軍奮勇擊退該署提督手刃多賊中槍陣亡實堪憫惻署福建陸路提督福甯鎮總兵林文察著交部照提督例從優議卹其同時

陣亡之遊擊李世進都司謝朝典守備闕文忠同
知平懋儒同知銜知縣謝穎蘇均著一併交部議
卹

徐宗幹又奏言閩省軍務繁興亟應整頓營伍
查福建水師提督吳全美前因江南凱撤粵勇
統帶回籍陸路提督郭松林現在江蘇軍營汀
州鎮總兵沈俊德現在湖北軍營已據各報來

閩相應請

旨飭下廣東江蘇湖北各督撫臣分飭迅速赴任以專責成此外尙有漳州鎮總兵李成謀金門鎮總兵王東華建甯鎮總兵張得勝並請

飭部一體查催赴閩於營務地方均有裨益奏入

上諭內閣曰福建水師提督吳全美統帶江南撤勇回粵陸路提督郭松林現在江蘇軍營汀州鎮總

兵沈俊德現在湖北軍營業經官文飭令帶兵赴
閩著毛鴻賓李鴻章官文分飭各該員等迅速赴
任其漳州鎮總兵李成謀金門鎮總兵王東華建
甯鎮總兵張得勝亦均在軍營帶兵著各該督撫
一體飭令赴閩以專責成毋再延緩

初九日

丙子

張之萬奏言髮捻各逆由鎮平紛竄

擾及裕州之趙河等處臣聞警卽於十二月初

一日進紫葉縣據報該匪在鎮平境內盤旋數日因馬山口有兵扼守連日分股來撲與我爭險均經防軍擊卻不得逞志遂相率北趨由南陽之石橋趨南召疾走魯山賊騎四出擾掠二十九日直薄魯山縣城全股在近城一帶游弋窺伺河汝等情查該匪自入豫境卽趨巖邑是其注意總在入山我軍馬山口之隊先賊扼險

賊果不敢由此深入無如扼險之兵有限賊竄之道無窮其扼紮鎮平與賊相持者僅恃湯聘珍及崔廷桂等數營該匪乘隙卽趨頭頭是道其鋒正銳勢難力堵現旣全股北走則鎮平之軍已出賊後且魯山西北皆山直接河汝該匪本有入山過冬再窺陝境之說難保不由此深入而豫省兵力除張曜等新挫之隊亦更無兵

可調臣已派張曜率領所部並統帶宋慶湯聘珍各軍卽日拔營由南召魯山一路盡力追剿並將臨勝四營及新募飛虎一營撥歸張曜宋慶管帶適僧格林沁亦於初二日督軍抵葉臣與會籌布置意見相同卽飭張曜迅統各軍剋日進剿僧格林沁本擬督帶馬隊疾趨郊汝與張曜等軍會合臣見該親王日夜奔馳於冰雪

中勞頓已極且馬隊亦皆疲乏該親王勇於滅
賊恐倉猝遇賊不能計出萬全因勉留暫住一
二日以資休息一面飛檄張曜等星夜前進此
時賊勢方張汝陝門戶洞開瞬息即可竄越且
黃河三門冰結成橋賊勢蔓延秦晉均恐震動
除飛咨各該撫臣嚴備邊防外臣惟有督飭將
領盡力以圖賊至何處卽由何處躡剿以期仰

慰

宵旰之憂奏入

上命議政王軍機大臣傳諭僧格林沁官文曾國藩
李鴻章喬松年張之萬沈桂芬劉蓉曰豫省髮捻
各逆由鎮平竄擾裕州之趙河等處屢經防軍擊
卻由南陽之石橋疾趨南召直薄魯山縣城全股
在近城一帶游弋窺伺河汝僧格林沁張之萬先

後督軍馳紮葉縣現將臨勝四營及新募飛虎一營撥歸張曜宋慶管帶剋日進剿卽著飭令該總兵等整飭諸軍取道前進魯山西北皆山直接河汝務須嚴飭張曜等軍繞出賊前合力兜擊勿令賊蹤竄入山險致滋蔓延僧格林沁所部馬隊日夜奔馳疲乏已極著俟暫行休息兵力稍紓卽由該親王統帶前赴郊汝相機籌度會合張曜等軍

穩慎進攻其扼紮鎮平之湯聘珍崔廷桂等數營
現已落在賊後應由何路調赴前敵截剿並豫省
本境有可添調之兵應行酌量調撥著僧格林沁
張之萬妥籌速辦會國藩前派分赴楚豫之劉連
捷劉銘傳等軍會否到防楚省現無賊蹤著會國
藩李鴻章迅檄劉連捷等所部星速赴豫毋許再
有稽延官文所部成大吉李成謀諸軍自應遵旨

飛速撥赴豫省助勦著僧格林沁檄調前進分投
堵勦陳國瑞因病請假諒已就痊並著僧格林沁
調赴前敵一面飛檄皖省之英翰郭寶昌蔣凝學
各軍迅赴南召魯山一帶前截後追以杜紛竄喬
松年卽催英翰等速行入豫以上各軍均歸僧格
林沁節制調遣如將士有畛域之見及赴調遲延
者均著嚴叅該處山路居多步隊尤爲得力該大

臣務須多爲之備加意慎重防意外之失該逆有
入山過冬再竄陝境之說現屆冬令黃河三門冰
結成橋匪蹤易於渡河秦晉毗境防務均形喫重
著沈桂芬嚴飭河防文武實力堵禦陝省毗連河
汝等處要隘並著劉蓉派兵嚴防速飭地方官整
飭民團妥籌守禦陝省防兵僅有興商數營較形
單薄如賊勢西趨陝疆著官文酌派勁兵越境兜

擊勿得稍分畛域

十三日庚辰官文奏冒髮擒逆匪全股竄入鄧州

臣前次奏報如賊紛竄卽令常星阿舒倫保溫
德勒克西姜玉順藍斯明等隨同僧格林沁出
境分追現又添派富森保楊朝林梁洪勝會同
常星阿等星夜馳赴鄧州內外夾擊以期聚殲
又派成大吉由老河口均光一路迎頭包襲兼

顧楚境提臣江長貴確探賊蹤扼守要隘李成
謀扼紮雙溝爲後路援應卽該逆有回噬之警
亦足以嚴邊界之防

官文又奏言查道員蔣凝學一軍自皖援鄂所
部僅三千數百人屢次戰捷以少勝多實屬忠
勇奮發該營參將劉維楨偵知羣賊中惟陳得
才爲最悍而陳得才黨與又以吳青汰爲最悍

蔣凝學遂令劉維楨宣布

皇仁暗施反間該道仍率部晝夜窮追十月初九日
追至霍山縣屬之長嶺菴賊目吳青汰率三萬
餘人因劉維楨以求降蔣凝學卽派知府蔣澤
澐率各營排陣要隘遣遊擊熊顯榮從九品何
林亨馳入賊中察其真僞首逆陳得才卽親率
大股來衝蔣凝學激勵吳青汰等勦賊立功吳

青汰卽與屈忠星等反戈殺賊蔣澤澤同總兵
李揚隆等乘勢痛勦擒斬極多是夜賊目范立
川帶同陳漢汰周添瞬等二萬餘人來降倪濬
漢及陳得才部黨高啟城等見吳青汰范立川
等反正相繼來歸者又五萬餘人蔣凝學馭之
以權懷之以恩各降衆均帖然心服陸續遣回
者共十一萬一千三百餘人留精壯在營效力

者三千餘人陳得才自度不支服毒自盡又經
范立川等掘獲屍身解至僧格林沁行營戮屍
傳首示衆實足大快人心所有出力各員應請
分別獎勵至蔣凝學一軍現經僧格林沁飭赴
商城聽候調遣定於十一月二十八日拔營星
夜馳往臣已於江漢關稅項內發給銀七萬兩
又購買米三千石解赴襄陽備領以利軍行

官文又奏言前准曾國藩咨稱已派劉連捷劉
銘傳等馳赴黃州因下游楚皖之交賊氛正熾
先其所急今楚境已靖賊蹤漸遠所有劉連捷
等軍自可無庸來楚臣已飭令駐紮英霍六安
潛太一帶以固楚皖門戶較之駐兵於黃州無
賊之地似爲有益奏入

上命議政王軍機大臣傳諭僧格林沁官文曰逆匪

由南召奔魯山窺伺河汝屢經降旨令官文派兵
赴豫助剿茲據官文奏稱已令常星阿舒倫保溫
德勒克西姜玉順藍斯明等隨同僧格林沁出境
分追現又添派富森保楊朝林梁洪勝等內外夾
擊又派成大吉由老河口均光一路迎頭包襲兼
顧楚境所籌均尙周妥現在賊衆北趨若不迎頭
攔截恐一入河汝將爲秦晉之患著催常星阿等

星馳前進歸僧格林沁調遣不得稍涉觀望楚省
要隘應辦防務卽責成江長貴李成謀等妥爲經
理以防回竄劉連捷等軍自可無庸赴楚惟該督
飭令駐紮英霍六安潛太一帶去賊太遠以有用
之兵置之無用之地殊爲可惜著僧格林沁遵照
疊次諭旨檄調來豫派赴前敵截剿以厚兵力蔣
凝學一軍現紮商城並著僧格林沁酌量調遣

上諭內閣曰逆賊陳得才黨與衆多最爲剽悍經蔣
凝學派參將劉維楨等剿撫兼施吳青汰等相繼
來歸陳得才因黨與離渙自度不支服毒自盡辦
理尙爲得手所有尤爲出力之參將劉維楨著免
升副將交軍機處記名遇有總兵缺出請旨簡放
並賞給固勇巴圖魯名號總兵袁秀林著交軍機
處記名遇有提督缺出請旨簡放並賞給彥勇巴

圖魯名號參將雷震雲著以副將儘先補用並賞
加總兵銜提督銜總兵李揚隆著照提督給予應
得封典遊擊熊顯榮著以參將留於湖北補用並
賞加副將銜知府蔣澤澧著以道員儘先選用從
九品何林亨著免升縣丞以知縣不論雙單月儘
先選用並賞戴藍翎縣丞賀廣澤韓彭壽均著免
選本班以知縣留於湖北儘先補用

官文又奏言查降衆頭目吳青汰范立川劉慎
元屈忠星魏濂幅周添瞬倪濠漢高啟城陳漢
汰劉喜高劉吉棕柳導有王輝炳朱應濠等雖
因被勦窮蹙率衆來歸惟爲數至十一萬四千
有奇且當陳得才親率大股來衝吳青汰等竟
能反戈相向擒斬極多迨陳得才自燬又經范
立川等掘獻屍身得以戮屍傳首用彰

國法而快人心伏思此次陳得才之死實由吳青
汰范立川之降可否仰懇

天恩准將吳青汰等分別獎勵出自

鴻慈奏入

上諭內閣曰降人吳清泰等率衆投誠人數至十一
萬四千餘名之多且當陳得才大股衝撲該降人
等反戈剿殺斬賊甚多致陳得才服毒自盡吳清

泰卽掘獻其屍用彰國法尙屬自知愧奮亟應破
格獎勵吳清泰著以都司儘先補用范立川等五
名均著以守備儘先補用並均賞戴藍翎范立川
並賞加都司銜倪隆漢等六名均著賞給五品銜
並賞戴藍翎王輝炳等二名均著賞給五品銜以
爲自拔來歸殺賊立功者勸

十四日辛巳富明阿奏言據江南徐州鎮總兵詹

啟綸稟稱湖北黃安縣連年被擾祖塋半多坍塌急須修培前因軍情喫緊未敢請假茲幸江南肅清揚軍遣撤擬請假三箇月回籍修墓等情可否俟該總兵料理撤防事畢賞假三箇月俾令回籍修墓之處出自

鴻慈奏入

上諭曰詹啟綸著俟料理撤防事畢賞假三箇月回

籍修墓

欽定剿平粵匪方略卷四百 甲子年

十二月十六日 癸未 沈桂芬奏言楚省髮

豫疆一由鎮平擾及內鄉淅川一由南陽北趨
南召計距晉界不遠沿河防所大同鎮兵居多
且皆調防三載久則易疲難期得力經臣豫商
護太原鎮總兵和昌卽在浦州等營派調兵丁
一千名就近添防又接賊竄魯山擾及臨汝鎮

之信計距茅津僅三百餘里必得添兵堵禦方保無虞兼因茅津以東三門等處已結冰橋和昌雖駐茅津尙須多帶精兵兼顧三門以東各要口隨時相機截擊而茅津又爲緊要渡口不可無重兵防守查副將羅承勳管帶二起楚勇赴甘肅經渡河當飭該副將折回茅津暫駐協防一面又添調太原平陽等營兵丁一千名飭

赴永濟至垣曲各渡口密布嚴防正擬奏報聞
又奉

諭旨該逆有入山過冬再竄陝境之說飭臣嚴扼河
防查沿河一帶業經次第添兵布置惟澤州尙
屬空虛儘豫匪竄至陝汝窺伺河朔則澤郡亟
應撥兵守口因於潞安澤州各營共派兵丁六
百名備調又於南路附近防所各營並省標精

兵內各挑備五百名以便續調策應奏入

上命議政王軍機大臣傳諭僧格林沁張之萬沈桂

芬曰豫省匪勢漸近晉疆沈桂芬酌調官兵並暫

留楚勇嚴防布置尙屬周密惟晉省兵丁向多孱

弱此次沈桂芬派出防兵務須揀擇精壯可用者

方不至有名無實和昌旣駐茅津著飭令整頓各

營將各處緊要渡口嚴密梭巡多設偵探與羅承

勳併力協守毋稍大意賊旣北趨魯山漸徧秦晉
僧格林沁張之萬當已相機兜剿扼其入陝其可
以竄入晉省之路尤應派兵截擊毋令闌入擾及
完善

十九日
丙戌刑部奏言遵查已革浙江臬司李元

度於募勇援浙時因浙東徧地賊蹤進兵之路
中斷孤軍未能深入杭州失陷非由該革員逗

留所致惟由平江通城尾賊而至於賊去後飾
報克復江西義甯等城勝仗以致湖北江西均
據以入奏迨因被叅革職輒欲將各營全撤偪
索軍餉不顧大局欽奉

諭旨著臣部分別情罪秉公按律定擬臣等悉心酌
議已革臬司李元度偪索軍餉不顧大局律例
並無治罪專條照不應重律罪止擬杖惟捏報

克復江西義甯等城以致湖北江西據以入奏
卽與自行具奏無異自應比律問擬李元度應
比照奏事上書詐不以實者杖一百徒三年律
擬杖一百徒三年係職官從重請

旨發往軍臺效力贖罪事犯雖在咸豐十一年十月
初九日

恩詔以前係因軍務獲咎應不准援免仍恭候

欽定奏入

上諭內閣曰已革浙江按察使李元度著照該部所
議從重發往軍臺效力贖罪

二十日丁亥護浙江巡撫布政使蔣益澧奏言准

閩浙督臣左宗棠咨稱著浙江按察使劉典在
楊坊等處失利等因逆勢猖獗已可概見臣惟
閩浙唇齒相依自應未雨綢繆妥爲布置刻下

左宗棠駐師延平浦城旣爲閩浙咽喉又爲延平後路較之衢城更爲扼要臣已飛檄署衢州鎮總兵劉清亮統領駐衢之湘勇三千人剋日移紮浦城擇要扼守聽候左宗棠調遣衢城爲浙江上游門戶且設閩浙糧臺亦未可稍涉大意臣復派副將余朝貴由杭率領新湘五營扼紮衢州與劉清亮浦城一軍聲勢聯絡並可保

護糧道臣猶恐兵力不敷並續委遊擊張政順
洪禎祥赴甯波募勇一千名認真訓練以備緩
急左宗棠用兵審機最微取勢甚遠萬一有必
須添調之處臣卽可騰出大枝勁旅協助勦辦
奏八

上命議政王軍機大臣傳諭左宗棠徐宗幹馬新貽
蔣益澧曰據蔣益澧奏接左宗棠咨稱劉典在楊

坊等處失利是賊勢猖獗閩省軍情萬分喫緊蔣
益禮現派劉清亮帶勇三千人移紮浦城聽候左
宗棠調遣並派余朝貴率領新湘五營扼紮衢州
與浦城一軍聯絡聲勢兼護糧道所籌均合機宜
左宗棠駐師延平想自能督率諸軍迅圖掃蕩其
泉州一帶及省城防守事宜並著徐宗幹會同左
宗棠妥籌布置劉典一軍失利情形著左宗棠查

明具奏蔣益澧現委遊擊張政順等前赴甯波募
勇訓練以便騰出兵力赴閩助剿應如何調撥之
處著左宗棠等斟酌妥辦其浙省毗連閩境並著
馬新貽蔣益澧實力籌防毋稍大意

二十一日 戊子 左宗棠徐宗幹奏冒據報逆首李

侍賢仍踞漳州汪海洋踞長汀連城上杭三縣
交界之南陽鄉及新泉一帶自永定上杭龍巖

至漳州縱橫數百里一片賊氛康國器一軍由
永安雁石進剿龍巖十二月初二日先飭知府
康熊飛等進紮距龍巖州城八里之鐵石洋賊
乘營壘未就突山大股來犯各軍力戰卻之初
五日又擊斃賊匪多名將城外賊巢焚燬初七
至十六等日該逆由東南北三門分路出撲並
疊出悍黨萬餘圍撲鐵石洋營壘均經擊退連

日共斃賊千餘名該逆因官軍深入先歟另股由永定出漳平以襲官軍後路朝天嶺守將陳元彩所部未築營壘遇大股賊至紛紛潰散守備熊應烈勢孤且戰且退比至嶺腳收隊退保漳平十一日賊撲漳平城垣適參將賴長自甯洋馳至與熊應烈登陴固守設伏誘之該逆遽擁而至衝過浮橋城上槍礮齊發左右伏兵突

起該逆紛紛潰走落水及踏死者不計其數賴
長熊應烈復率勇開城出擊將洪橋賊館焚燬
賊向朝天嶺退去其劉典一軍由連城進攻汪
逆新泉南陽老巢十七十九等日連破下車上
下羸馬洋洞賊卡賊壘正擬傳令收隊參將劉
大謨等乃恃勇輕進甫行數里汪逆嗾各路悍
賊分路包抄各營面面受敵劉大謨及營官鍾

九如各受重傷副將盧華勝參將劉敬廷血戰陣亡劉典急率隊馳援該逆另股已抄襲後路遊擊郭立本力戰死之賊遂乘勢徑撲楊坊行營劉典與各軍折回援救已見壘中火起同知李光瑩等均守壘遇害查汪逆因康國器一軍進逼龍巖希圖圍攻漳平以抄官軍之後劉典抵連城後先攻汪逆老巢原欲分賊勢以解漳

平之圍布置本屬周妥因山徑紛歧客軍初至
未及審眎戰地劉大謨違令輕進遂致爲賊所
乘現在王德榜王開琳兩軍計期可抵汀州賴
長熊應烈等軍已經康國器調赴雁石護汀漳
龍道趙均已率所部嚴扼漳平此路兵力漸厚
臣飭劉典固守連城所部李耀南張福齊兩軍
銳氣未減可與王德榜王開琳兩軍聯絡以圖

汪逆其高連陞一軍現紮萬松關瑞香亭一帶
以扼漳州東路黃少春一軍亦馳赴長泰以扼
漳州東北一路連日該逆堅匿不出漳州城外
數十里地勢平衍自林文察敗歿後附近村莊
多被賊脅必先將村莊撫定乃免內患現檄高
連陞黃少春勿攻城勿浪戰深溝固壘能誘賊
出撲反客爲主痛剿數次然後機有可乘長泰

一路與漳平連界能就近聯絡庶可防紛竄而
衛泉廈臣等會商辦賊之法必須先取遠勢漸
偏漸近驅各處股匪歸併一處合力蹙之完善
之區始得保全而兵力亦敷分布未敢急目前
之效致誤大局也此次署按察使劉典先勝後
挫自請議處咎有應得惟念該員因救援漳平
龍巖各軍冒險急進情有可原應懇

天恩免其置議以觀後效參將劉大謨管帶各營違
令輕進致有貽誤實難辭咎遊擊陳元彩經康
國器飭令嚴扼朝天嶺遇賊卽潰實屬庸懦無
能均應請

旨革職拏問閩浙補用副將盧華勝等相應開列請
旨飭部照陣亡例議卹參將賴長力守漳平擊退巨
股逆匪應請

旨賞給勇號以示鼓勵

同日毛鴻賓郭嵩燾奏言據臬司李福泰等稟稱副將何雲章派勇赴援閩省之詔安旋督大隊繼進賊見我兵繼至當卽退回雲霄何雲章鼓勵兵勇糾合鄉團由詔安進攻雲霄遇賊於雲霄城外之莆尾鄉出其不意擊之賊衆披靡殺傷不計其數追至雲霄城外紮營惟龍連汀

杭一帶界接漳州不能不防其回竄臣飭李福泰往來嘉應惠州之間相機調度方耀一軍由武平進紮上杭之蟒蛇渡先顧上杭進規永定鄭紹忠一軍駐紮上杭之峯市與翟國彥聯絡以固大埔之防並與方耀互相策應以圖永定之賊翟國彥等軍分紮大埔之石下壩饒平之柏嵩關以固潮州門戶黃龍翔周陞等分紮武

平鎮平各要隘以固嘉應門戶仍飭李福秦相
度機宜俟各路大兵雲集會合進剿

毛鴻賓又奏旨准福建水師提督吳全美咨稱
從征在外十有餘年屢接家書知先人墳墓多
有傾圯祇以軍旅任重未敢請假回籍興修茲
因統帶師船旋粵擬卽乘便回籍修理墳塋懇
代爲奏請給假三箇月等情臣覆查無異合無

顧懇

天恩賞假三箇月俾吳全美回籍修墓一俟假滿卽
行入覲

天顏斷不敢稍任延緩均奏入

上命議政王軍機大臣傳諭左宗棠毛鴻賓李鴻章
徐宗幹郭嵩燾馮子材曰逆首李侍賢仍踞漳州
汪海洋踞長汀連城上杭交界之南陽鄉劉典一

軍新挫逆勢狹猖該督所籌辦賊之法先取遠勢
漸偏漸近驅令歸併一處然後合力蹙之實爲切
中機宜現在王開琳王德榜兩軍計可抵汀賴長
等軍經康國器調赴雁石趙均所部亦已嚴扼漳
平此路兵力較厚著左宗棠徐宗幹妥籌布置務
期聯絡聲勢先將汪逆巨股殄除以期進偏龍巖
劉典退保連城之軍尤當穩慎進取勿再疏失漳

州城外地勢平衍附近村莊多爲賊脅高連陞一
軍現紮萬松關瑞香亭一帶以扼漳州東路黃少
春一軍馳赴長泰扼漳州東北一路該逆堅匿不
出伺隙圖逞乃其慣技左宗棠務令各軍深溝固
壘先爲不可勝以待賊之可勝其漳軍後路及泉
廈門戶須節節布置嚴密毋爲賊匪所乘閩省賊
勢甚重該處兵力恐有不敷江南現已無警著李

鴻章於蘇省防兵內酌量抽撥礮隊赴閩歸左宗
棠調遣李鴻章所部除劉銘傳一軍已赴豫省外
此外該省得力兵將左宗棠如須添調卽一面檄
調一面奏聞以資協助毛鴻賓等奏官軍赴援詔
安乘勝進逼雲霄惟龍連汀杭一帶界連漳州不
能不防其回竄著卽飭令李福泰督飭諸軍相機
進剿務先嚴防本境門戶毋得稍有疏虞賊如不

得逞志於閩必將全力趨粵馮子材久歷戎行深
明韜略著暫留廣東督辦東江軍務卽赴大埔饒
平之交擇要駐紮堵剿漳州大股踞逆李福泰俟
馮子材到防後再行回省吳全美統帶師船回粵
著賞假三箇月回籍修墓福建軍務緊要著毛鴻
賓傳知該提督假滿後卽馳赴福建水師提督新
任毋庸來京陛見

上諭內閣曰此次劉典進兵先勝後挫咎有應得惟該員因救援漳平龍巖官軍冒險急進情有可原著加恩免其置議參將劉大謨違令輕進致有貽誤實雖辭咎遊擊陳元彩扼守朝天嶺遇賊卽潰實屬庸懦無能均著卽行革職拏問副將盧華勝參將劉敬廷遊擊郭立本同知李光瑩知縣夏世楷州判姜景焜生員謝封擬保訓導龍鴻賓從九

品蕭子麒監生沈超童生黎斗城均著交部照陣
亡例議卹參將賴長力守漳平擊退巨股逆匪著
賞給著勇巴圖魯名號

同日劉蓉奏言髮捻各逆始由棗陽回竄豫境
之鄧州繼由鎮平分股竄至南召白土岡及鎮
內交界之馬山口等處駸駸入山並聞有赴河
南府過年再圖入陝之信臣以賊勢愈趨愈近

興商一帶隘口繁多萬一該逆經鄂豫官軍圍剿緊急或竄浙川以圖商南或趨鄖西以窺山陽均應先事豫防當飭鎮西軍鄢太愚駐紮商南之富水關隴軍黃加焜駐紮山陽之漫川關並調派駐防鳳縣之毅軍二營駐紮商州山陽交界之竹林關扼要防堵又恐兵力尙單札商在籍主事管湧等統率團練協同官軍分路守

禦以壯聲威前蒙

皇上廕念陝防單薄

飭令湖廣督臣官文酌派勁兵越境兜擊伏懇

聖恩飭下官文僧格林沁懍遵前

旨分撥安肅道蔣凝學一軍繞赴浙川駐紮荆子關
爲繞前截擊之師則浙川鄖西兩路既可兼顧
並與臣派防富水關等處之軍聲勢聯絡實於

防勦機宜兩有裨益奏入

上命議政王軍機大臣傳諭僧格林沁官文劉蓉曰
劉蓉現派鄆太愚等駐紮富水等關並聯團協勦
以壯聲威均著照所擬辦理前諭官文如賊勢西
趨陝疆酌派勁兵越境兜擊並以蔣凝學現紮商
城諭令僧格林沁酌量調遣茲據劉蓉奏請分撥
蔣凝學一軍繞赴浙川駐紮荆子關爲繞前截擊

之師於浙川鄖西兩路均可兼顧等語現在蔣凝
學未知由何路進剿應否卽令該道進駐荊子關
或另騰出兵力前往扼紮以固秦疆門戶之處著
僧格林沁官文妥籌辦理劉蓉仍當就本省兵勇
力遏賊氛不得專待鄰省撥兵一味株守致令無
賊之區又被蹂躪

二十二日 己丑 僧格林沁奏言據報髮逆捻逆由

南召竄魯山縣以北梁窪楊樓及寶豐縣以西
張八橋一帶盤踞臣於十二月初五日督帶馬
步各隊取道郊縣初九日進紮寶豐令總兵郭
寶昌張曜等分道進攻因限於地勢未能得手
必須步步爲營乘隙進取臣晤撫臣張之萬籌
商進剿機宜非近賊安營日夜規取不能制賊
之命而我軍現無帳房駐軍總在十里以外出

隊奔馳已有賊逸我勞之勢因囑張之萬多備
帳房作速解營以資應用一俟帳房解到卽令
各營步隊偪賊紮營相機攻擊並飭張曜等督
帶隊伍由魯山向梁窪一帶進剿以牽制賊勢
使其首尾不能相顧而收夾擊之效至臣疊奉
諭旨飭令劉連捷劉銘傳等軍探蹤前進歸臣調遣
仰見

宸謨廣運厚集兵力之至意惟聞此二軍守則有餘
戰則不足似可暫緩來營臣查各營中紀律嚴
明打仗得力者惟提督姜玉順一軍業經札調
來豫協同進剿並擬調英翰所部副將黃秉忠
同知史念祖管帶兩營步隊來豫助剿再臣前
見徐州鎮總兵詹啟綸所帶勇隊頗稱驍勇相
應請

旨飭令總兵詹啟綸選帶勇隊三千名迅速來營合
以黃秉忠史念祖兩軍與各路官軍勦辦髮捻
股匪庶可迅殄賊氛奏入

上命議政王軍機大臣傳諭僧格林沁官文張之萬
曰逆賊麴聚張八橋梁窪等處郭寶昌張曜等分
道進攻因限於地勢尙未得手該親王擬俟帳房
解到偪賊而營著卽督飭郭寶昌等穩慎進兵不

得稍有疏失張曜一軍著僧格林沁張之萬督令
將梁窪賊壘攻拔使該逆首尾不能相顧自可收
夾擊之效該親王營內需用帳房著張之萬督飭
趕緊運解以資利用姜玉順一軍著官文卽行催
令赴豫協剿歸僧格林沁調遣劉連捷劉銘傳等
勇隊疊在江南克復城邑均是百戰勁旅卽不令
當前敵亦可調令防堵要隘藉壯聲援俟該提督

等到營仍由僧格林沁酌量調派詹啟綸前經請
假回籍修墓業經賞假三箇月計期尙未起程本
日已諭知富明阿令該總兵挑選精銳勇丁三千
名剋日赴豫俟豫省軍務肅清再令詹啟綸回籍
如已回湖北本籍卽著官文飭令趕緊赴豫其英
翰所部之黃秉忠等二員亦經諭令喬松年飭令
管帶兩營迅速赴豫

上又命議政王軍機大臣傳諭富明阿喬松年曰前
因富明阿奏詹啟綸請假修墓當經批諭詹啟綸
俟料理撤防事畢賞假三箇月回籍修墓現在豫
省匪勢猖獗竄擾南召魯山該逆一入山險非有
得力步隊不足以資剿洗著富明阿檄飭詹啟綸
選帶精銳勇隊三千名速赴僧格林沁軍營俟豫
省軍務肅清再行遵照前旨飭令回籍修墓英翰

部下黃秉忠史念祖管帶步隊兩營尙能得力著
喬松年飭令星馳入豫迅赴僧格林沁軍營聽候
調遣

二十六日
癸巳李鴻章奏言欽奉

諭旨飭調劉銘傳所部星速赴豫查劉銘傳一軍在
蘇境轉戰數年所用均係外洋軍火劉銘傳營
內並有練成開花礮隊一營共洋礮二十餘尊

大者四五千斤小亦千餘斤數百斤不等車架
器具笨重異常礮彈火藥動需數萬蘇省水鄉
賴有船隻運駛故赴機應敵不致遲誤一經派
往陸路攜帶轉運萬分掣肘勢難如期應調臣
於十二月初六日自金陵起程回蘇其時曾國
藩先奉

諭旨飭調劉銘傳赴豫與臣再四籌商苦無善策臣

抵蘇後接據劉銘傳由六安來稟以內河水涸
舟膠倉猝趨行所有洋槍炸礮配用藥彈不能
多運須俟來春水長始可設法陸續運營未便
卽赴豫省等情臣查劉銘傳係蘇軍驍將向來
奉調卽行惟該軍事恃槍礮軍火目前旣未運
齊似難遠調南召魯山在豫省西北由六安西
去千餘里均係陸路不通水道糧餉軍火由蘇

解濟遠隔數千里深恐呼應不靈且賊蹤飄忽
節節落後亦恐於大局無裨臣統帶該軍較久
深悉實在軍情不敢不詳細上陳奏入

上命議政王軍機大臣傳諭李鴻章曰劉銘傳赴豫
既據該撫奏稱恐於大局無裨卽著毋庸檄令前
赴豫省閩匪日肆獍狘前諭李鴻章於蘇省防兵
內酌量抽撥礮隊赴閩歸左宗棠調遣現在劉銘

傳旣毋庸入豫而由蘇赴閩水道可通攜帶轉運
尙屬不難著李鴻章與左宗棠妥爲籌商如閩省
應需該營前往協剿卽著該撫檄飭劉銘傳統帶
所部星速赴閩聽候左宗棠調遣

同日張之萬奏言賊衆分踞魯山之梁窪寶豐
之張八橋等處十二月初九日僧格林沁親督
馬步進軍寶豐密派勇目張玉等探明賊館處

所導引官軍襲取賊壘十一日副將略得勝等
前往劫營各勇銜枚宵進襲破張八橋賊圍逆
衆奪路而遁其張曜宋應等軍由南召取道前
進先後馳抵魯山十一日各率所部分道進剿
行至段店西北賊壘林立未便深入十三日張
曜挑選奮勇夜劫賊營疾行十餘里至浪店地
方拔柵而進襲破賊卡斬首十餘級近村踞匪

聞聲驚走十五日張曜等復整軍而出甫至段
店忽梁窪大股踞賊由左右村莊蠶擁而出守
備周步升外委王克仁各率本哨衝入賊陣同
時陣亡該匪屢次衝撲經張曜等迎擊槍礮環
施斃匪多名始行收退查我軍連日進剿賊之
出竄事在意中河洛爲賊往來熟徑空虛可慮
昨與僧格林沁籌商該大臣毅然以河洛門戶

自任臣身膺疆寄敢不竭力兼籌現有已革副
將徐邦道自募川勇兩營來豫投效經臣點驗
此軍頗爲精壯少加簡練卽令馳赴河洛扼要
防剿一面飛飭張曜等激勵軍士隨同僧格林
沁大軍兩路夾攻爲就地聚殲之計守備周步
升外委王克仁力戰捐軀深堪憫惻合無籲懇
天恩飭部從優議卹奏入

上諭曰據奏魯山寶豐襲剿情形與僧格林沁前奏
略同著仍遵前旨督飭張曜一軍迅克梁窪賊壘
隨同僧格林沁大軍兩路兜擊河洛之防至關緊
要並飭徐邦道扼要防剿毋稍疏虞陣亡之周步
升王克仁均著交部從優議卹

二十七日甲午富明阿奏冒江北水陸各軍奉

旨全數撤防並蒙

恩准借撥冬漕折色搭放欠餉臣遵查揚防陸路兵勇共存一萬四千餘人擬卽分爲三起凱撤惟漕價一款各州縣徵收不及一時未能應手不得已先將頭起所裁兵勇十二營共計五千餘人按照定章找清欠款分別遠近派委官弁管帶各回原籍本省招募者卽就近解交揚州府妥爲遣散安插俱已一律起行現在趕緊催提

漕價料理二起所裁十二營共兵勇五千餘人
卽於年內一併起程所贖三起兵勇四千人擬
俟提齊漕價後再於明年正月妥爲遣撤其水
師留防礮划並官弁勇丁亦經裁竣已將總兵
詹啟綸報捐大小礮船十八隻並由湖北新製
礮划八十隻一併解送督臣曾國藩酌撥配用
至各營呈繳槍礮器械除撥歸旗綠各營外其

餘均解交糧臺存儲備用再揚州府所屬被擾
地方營汛久經廢弛前此十有餘年恃有重兵
扼紮始得保全裏下河完善之區今當各路凱
撤散勇游兵處處皆是疊據總兵李德麟等稟
報拏獲搶劫各犯訊明就地正法此時防兵尙
未裁竣已有不法匪徒肆意搶劫若將來全軍
凱撤更難保無宵小潛跡滋生事端地方營汛

亟宜趕緊整頓查揚防各營勇丁籍隸揚州府屬者甚多若挑選精壯補足兵額勤加訓練自足保衛閭閻如餉需不敷似不妨於揚防節省項下提撥按月散放如此變通酌辦庶巡防不致廢弛而裏下河一帶亦可益臻安謐奏入

上命議政王軍機大臣傳諭會國藩富明阿曰富明阿奏揚防全軍分起凱撤並將礮船礮划解送會

國藩酌撥配用各營呈繳槍礮器械分撥旗綠各營並糧臺存儲備用等語所辦尙屬周妥著富明阿按照定章分別資撤並飭管帶各員妥爲鈐束毋任沿途逗留滋事致貽後患至該將軍奏稱裏下河一帶游兵散勇滋事亟宜整頓營汛以資彈壓所籌自係實情著曾國藩酌量情形妥籌辦理